



Adresseinformasjon fylles inn ved ekspedering.  
Se mottakerliste nedenfor.

Dato: 24.08.2021  
Vår ref: 20/02912-19  
Deres ref:

## **Tildeling av driftskonsesjon etter mineralloven for Sandvensura i Ullensvang kommune. Tiltakshaver: Hardangerskifer AS**

### **POST- OG BESØKSADRESSE**

Ladebekken 50  
7066 Trondheim

**TELEFON** +47 73 90 46 00

**E-POST** post@dirmin.no

**WEB** www.dirmin.no

**GIRO** 7694.05.05883

**SWIFT** DNBANKOKK

**IBAN** NO5376940505883

**ORG.NR.** NO 974 760 282

### **SVALBARDKONTOR**

**TELEFON** +47 79 02 12 92

### **1. Konsesjonen**

Direktoratet for mineralforvaltning med Bergmeisteren for Svalbard (DMF) viser til søknad om driftskonsesjon datert 23. juli 2021 fra Hardangerskifer AS med organisasjonsnummer 968 125 001.

Hardangerskifer AS, med organisasjonsnummer 968 125 001, heretter kalla «Tiltakshavar» eller «Tiltakshavaren», får med dette driftskonsesjon etter minerallova § 43.

Tiltakshavaren får driftskonsesjon for uttak av mineralske ressurser i Sandvensura på deler av eiendommene 315/2, 315/16, 330/1, 330/18 og 330/149 i Ullensvang kommune. Mineralførekomenstn hører til kategorien mineral som grunneigaren eier.

Konsesjonsområdet har eit areal på kring 330 daa og går fram av vedlegg 1 «Kart over konsesjonsområdet - Sandvensura».

Etter reguleringsplan Kvernuri vedteke den 20. juni 2018 av tidligare Jondal kommune er området regulert til Steinbrot og masseuttak. PlanID: 1227 2014002.

**Tildeling av driftskonsesjon erstattar ikkje krav om andre løyve, godkjenning, arealavklaring eller konsesjon etter anna lovsgiving. Tiltakshavaren er ansvarleg for å innhente andre nødvendige løyve.**

### **2. Vilkår for driftskonsesjonen**

Konsesjonen blir gjeven på desse vilkåra:

#### **2.1. Driftsplan**

Drifta skal til ei kvar tid gå føre seg i samsvar med ein driftsplan godkjend av DMF.

Dersom tiltakshavaren ønskjer å gjere vesentlege avvik frå driftsplanen, skal DMF godkjenne dette på førehånd.



DMF kan krevje ny oppmåling og at ajourførte kart og profilar skal sendast inn når DMF finn det nødvendig.

## **2.2. Økonomisk sikkerheit**

Tiltakshavaren blir pålagd å stille økonomisk sikkerheit med NOK 2 040 000, som skildra i punkt 5.11 av vedtaket, for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51.

Den økonomiske sikkerheita skal stillast i form av ein bankgaranti for eit grunnbeløp på NOK 510 000, og deretter årlege avsetjingar til ein bankkonto som det skal etablerast pant i til fordel for DMF slik at tiltakshavaren ikkje kan råde over kontoen på noko vis, begge deler som skildra i punkt 5.11.

Før drifta startar skal tiltakshavaren ha:

- (i) inngått ein avtale om finansiell sikkerheit med DMF, vedlegg 2;
- (ii) lagt fram påkravsgaranti frå bank som DMF vurderer som tilfredsstillande, vedlegg 3;
- (iii) etablert pantet til fordel for DMF, jf. pantelova §§ 4-4 til 4-6, vedlegg 4.

## **2.3. Bergteknisk ansvarleg**

Det skal utan grunnlaust opphald sendast skriftleg melding til DMF om alle skifte av bergteknisk ansvarleg for eit uttak.

## **2.4. Andre vilkår**

Den regulerte føremålgrensa for massetaket skal setjast ut eller markerast i terrenget på ein slik måte at den er lett synleg gjennom heile driftsperioden.

## **3. Godkjenning av driftsplan**

DMF godkjenner driftsplanen for Sandvensura i Ullensvang kommune. Den godkjende versjonen av driftsplanen ligg ved dette konsesjonsvedtaket.

## **4. Høyring**

Søknaden om driftskonsesjon har vore på høyring, jf. forvaltningslova § 17, hos desse høyringsinstansane: Statsforvalteren i Vestland, Vestland fylkeskommune, Ullensvang kommune, NVE region Vest, Statens Vegvesen, Statnett SF og grunneigarar til uttaket.

Høyringsperioden var frå 28. april 2021 til 26. mai 2021.

Frå høyringsfråsegnene har DMF særleg merkt seg dette:

### NVE- Norges vassdrags og energidirektorat

NVE viser til at dei har medverka i arbeidet med reguleringsplanen for området, og at dei ikkje har nokon merknader «så lenge tiltaket held seg innanfor reguleringsplanen sine rammer».

### Statsforvalteren i Vestland



### **«Om observasjon av truga arter i området**

I høyringsbrevet vart det trekt fram registrerte funn av makrellterne og fleire artar av særleg stor forvaltningsinteresse i nærleiken av uttaket. Søk i Artskart i mai 2021 viser funn av dei raudlista artane taksvale, fiskemåke, stær og skimmelflaggermus i tillegg til makrellterne i nærområdet til det omsøkte masseuttaket. Det er etter Statsforvaltaren sin vurdering svært lite sannsynleg at det omsøkte tiltaket vil ha nokon verknad på førekomensten av desse artane.

### **Det er forbode med partikkelavrenning til vassdrag**

Uttak av mineral kan vere forureinande, og forureiningslova slår fast at det er forbode å forureine. I søknaden vert det opplyst at arealet har eit lite nedslagsfelt som fører vatn inn til området, og at grunnen og geologien er prega av oppsprekking med god drenasje. Verksemda opplyser om at det kan oppstå produksjon av slam og mudd på driftsveger og plassar, og at det er intern infrastruktur i brotet som fører overvatn i korte strekk mot terrenget. Statsforvaltaren vil understreke at verksemda må sikre at det ikkje blir avrenning av partiklar og slam til nærliggjande vassdrag, bekkar og fjordar.

### **Handtering av mineralavfall**

Frå driftsplanen går det fram at det skal etablerast eit skrotsteinsdeponi. Kapittel 17 i avfallsforskrifta handlar om handtering av mineralavfall. I eit eventuelt driftsløyve bør det nemnast at verksemda må etterkomme reglane i forskrifta for mineralavfall ved verksemda. Det betyr mellom anna at dersom skrotsteinsdeponiet kan medføre forureining eller virke skjemmande, må verksemda ha løyve frå forureiningsstyresmaktene, og viss verksemda produserer mineralavfall må det utarbeidast ein avfallshandteringsplan som skal godkjennast av Statsforvaltaren.

Overskotsmassar bør i så stor grad som mogleg bli tilbakeført og nytta til tildekking og opprydding etter at drifta i uttaket er avslutta.

### **Lagring av tilkøyrd massar**

I reguleringsføresegne til detaljreguleringsplanen for området står det at «I steinbrotet kan det drivast uttak av stein, mellomlagring av stein og massar og lagring av tilkøyrd massar». Statsforvaltaren vil opplyse om at dersom verksemda tek imot massar eller skrotstein frå anna stad, vert dette rekna som eit avfallsmottak, og må vurderast etter avfallsregelverket.

### **Dumping av stein i sjø**

I driftsplanen skriv verksemda at dersom kapasiteten på skrotsteinsdeponiet vert for liten i sluttfasen, er det «tilgang til deponering på godkjent industriområde i Mikkjelsvika sjødeponi nord for Fv. 550». Dersom verksemda skal dumpe stein i sjøen krev dette ein avklaring frå Statsforvaltaren om tiltaket er søknads- og konsesjonspliktig etter forureiningslova med tilhøyrande forskrifter.

### **Knuseverk er regulert i forureiningsforskrifta**

Viss det er eit knuseverk på staden gjeld kapittel 30 i forureiningsforskrifta om forureining frå produksjon av pukk, grus, sand og singel. Den set krav til



utslepp til vatn, støy og støv. Statsforvaltaren skal ha melding om knuseverk. Det er eit eige skjema på våre nettsider som kan nyttast som meldeskjema».

*DMFs kommentar: DMF tar fråsegnet til etterretning. DMF er også einig i Fylkesmannen sin merknad av viktigheten av å framheve at tiltakshavaren skal følgje anna regelverk sjølv om dei med dette får eit løyve etter minerallova. Løyvet etter minerallova erstattar ikkje andre naudsynte løyve etter anna regelverk, jf. minerallova § 5. DMF understrekker difor viktigheta av at tiltakshavaren set seg inn i kva for krav som gjeld til verksemada etter anna regelverk, under dette avfalls- og forureningsregelverk. DMF føreset at tiltakshavaren set seg inn i og følgjer dei retningslinene og føresegnsene som følgjer av anna regelverk. I tillegg oppmodar vi tiltakshavaren om å ta kontakt med Statsforvalteren dersom de treng rettleiing med tanke på behov for søknad/melding etter forureiningsregelverket.*

## 5. DMF si vurdering

Føremålet til minerallova er å fremje og sikre samfunnsmessig forsvarleg forvaltning og bruk av mineralressursane i samsvar med prinsippet om ei berekraftig utvikling.

Etter minerallova § 43 er det krav om driftskonsesjon frå DMF for samla uttak av mineralførekomstar på meir enn 10 000 m<sup>3</sup> masse og for alt uttak av naturstein. Berre den som har utvinningsrett kan få driftskonsesjon.

Konsesjonssøknader går gjennom ei skjønnmessig prøving før det blir avgjort om det skal gjevest driftskonsesjon. I vurderinga av om det skal gjevest driftskonsesjon skal det leggjast vekt på om søkeren er "skikka" til å utvinne førekomsten. Dette inneber at ein skal leggje vekt på om prosjektet ser ut til å vere økonomisk gjennomførbart, om det blir lagt opp til bergfagleg forsvarleg drift, og om søkeren har tilstrekkeleg kompetanse til å drive førekomsten. I vurderinga av om det skal gjevest driftskonsesjon skal det òg leggjast vekt på omsyna som er nemnde i minerallova § 2.

DMF kan fastsette vilkår for ein driftskonsesjon. Når DMF avgjer kva vilkår som skal stillast, vurderer direktoratet mange av dei same omsyna som er relevante for vurderinga av om det skal gjevest konsesjon.

DMF har vurdert konsesjonssøknaden slik:

### 5.1 Utvinningsrett

Mineralførekomsten som skal utvinnast tilhører kategorien mineral som grunneigaren eig. Tiltakshavaren er ikkje grunneigar for konsesjonsområdet, og det blir difor kravd avtale med grunneigaren om utvinningsretten til førekomsten.

Tiltakshavaren har i søknadsprosessen lagt fram avtalar med grunneigarane for 315/2, 315/16, 330/18, 330/1 og 330/149 i Ullensvang kommune, som dokumentasjon for utvinningsrett.

Eigedommen 315/16 er eit sameige mellom 7 sameigare. Tiltakshaver har fremlagt avtale med 5 av dei 7 sameigarene. I tillegg har Tiltakshaver lagt frem ein avtale som dokumentarar at dei kan kjøpa dei andre 2/7 sine sameigedelar viss Tiltakshaver gis driftskonsesjon. Tiltakshaver blir då sjølv eigar av dei resterande 2 /7 og det trengs difor ikkje ein avtale om utvinningsrett for desse to sameigedelane.



## **5.2. Arealmessig status for tiltaket**

Konsesjonsområdet har eit areal på kring 330 daa og går fram av «Kart over konsesjonsområdet - Sandvensura».

Området er i reguleringsplan Kvernuri, vedteke den 20. juni 2018 av tidligare Jondal kommune, regulert til Steinbrot og masseuttak. PlanID: 12272014002.

## **5.3. Økonomien i prosjektet**

DMF har vurdert den vedlagde informasjonen om økonomien i prosjektet. Etter DMF si vurdering er prosjektet økonomisk gjennomførbart.

## **5.4. Driftsplan**

For å sikre at kravet om bergfagleg forsvarleg drift blir oppfylt, finn DMF grunn til å ta inn i konsesjonen eit vilkår om at drifta til ei kvar tid skal gå føre seg i samsvar med ein driftsplan godkjend av DMF.

Driftsplanen skal vere eit styringsverktøy for Tiltakshavaren i gjennomføringa av uttaket, og eit referansedokument i samband med DMF sine tilsyn.

I samband med søknaden har Tiltakshavaren lagt fram eit framlegg til driftsplan for uttaket.

Framlegget til driftsplan omfattar heile driftsperioden og avsluttinga av steinbrotet. Skildringa og kart- og snitteikningar presenterer den planlagde brytinga av førekomensten innanfor arealet på 330 dekar som søknaden gjeld. Det totale volumet fast fjell som skal takast ut er estimert til 1 230 000 m<sup>3</sup>. Det årlege uttaket vil variere med marknaden, men det planlagde uttaket per år er 30 – 40 000 faste m<sup>3</sup>. Det er planlagt drift i fire fasar. Utdrivne område som ikkje trengst i den vidare drifta, skal setjast i stand fortløpende. Det blir òg presentert ein plan for sikring og avslutting. Planen er å føre brotområdet tilbake til LNF-område.

Etter DMF si vurdering kan den vedlagde versjonen av driftsplan for Sandvensura i Ullensvang kommune godkjennast. Ein finn at planen tilfredsstiller dei krava som DMF stiller til driftsplanar, og etter DMF si vurdering legg planen opp til bergfagleg forsvarleg drift.

Dersom det under drifta oppstår nye situasjoner eller andre endringar i føresetnadene for drifta, til dømes geologiske og kvalitetsmessige variasjonar, bør det likevel på visse vilkår kunne opnast for å gjere endringar og tilpassingar i planen. Dersom Tiltakshavaren ønskjer å gjere vesentlege avvik frå driftsplanen, skal DMF godkjenne dette på førehånd.

Undervegs i drifta kan DMF få bruk for oppdaterte kart og snitt som dokumenterer den noverande situasjonen i uttaksområdet og status i høve til den godkjende driftsplanen. Det blir difor teke inn som eit vilkår i konsesjonen at DMF kan krevje at Tiltakshavaren gjer ny oppmåling og at ajourførte kart og profilar skal sendast inn når DMF finn det nødvendig.

## **5.5. Bergfagleg forsvarleg drift**

Kravet om at drifta til ei kvar tid skal gå føre seg på ein bergfagleg forsvarleg måte



inneber at aktiviteten må vere i samsvar med tilfredsstillande faglege standardar for denne typen verksemد.

Etter DMF si vurdering er den føreslegne driftsplanen for uttaket bergfagleg forsvarleg. Ved vurderinga har DMF lagt vekt på driftsplanen for uttaket.

#### **5.6. Søkjaren sin kompetanse for drift av førekomsten**

I vurderinga av om søkjaren har tilstrekkeleg kompetanse er det den totale kompetansen som søkeren har tilgang til som skal vurderast opp mot kravet om å vere skikka.

Etter forskrift til minerallova § 3-1 skal alle uttak av mineralske ressursar ha ein bergteknisk ansvarleg.

Tiltakshavaren har i søknaden gjeve opp Bård Sandven som bergteknisk ansvarleg for uttaket. Personen er registrert hos DMF som bergteknisk ansvarleg for uttaket og oppfyller kvalifikasjonskrava i forskrifta, med vilkår om at det blir leiga inn bergfagleg bistand for å dekke opp manglande formell bergfagleg kompetanse hos Bård Sandven.

Ved dato for konsesjonsvedtak, føreligg det avtale om innleie av bergteknisk ansvarleg mellom bergingeniør Vegard Løwø og Hardangerskifer AS.

Etter DMF si vurdering har Tiltakshavaren tilstrekkeleg kompetanse til å drive førekomsten.

#### **5.7. Dei miljømessige konsekvensane av utvinning**

I vurderinga av om det skal gjevast driftskonsesjon skal det leggjast vekt på omsynet til miljøet og kulturminne.

Det finst ein godkjend reguleringsplan for uttaket. I samband med planprosessen er det gjennomført ei konsekvensutgreiing som skildrar naturområde/ biologisk mangfald i området.

##### *Vurdering etter naturmangfaldlova*

Naturmangfaldlova § 7 pålegg alle offentlege instansar som tek avgjerder som påverkar naturen å vurdere planlagde tiltak opp mot prinsippa i naturmangfaldlova §§ 8–12. Reguleringsplanen, høyningsfråsegner og eigne søk i Naturbase og Artskart er lagde til grunn for vurderingane etter naturmangfaldlova i DMF si handsaming av søknaden. Det er ikkje kome fram opplysningar i vurderingsgrunnlaget som tyder på at uttaket vil kome i konflikt med naturverdiar i området.

I konsekvensutgreiinga i forbindelse med reguleringsplanen punkt 6 er «naturområde/ biologisk mangfald» vurdert.

DMF reknar kunnskapskravet i naturmangfaldlova § 8 for oppfylt. Sidan uttaket ikkje vil ha nokon større verknad på naturmangfaldet og ein ikkje kan påvise at tiltaket vil påverke truga, nær truga eller verdifull natur, legg DMF til grunn at det ikkje er nødvendig å gjere vidare vurderingar etter miljøprinsippa i naturmangfaldlova §§ 9–12.

##### *Avrenning*



Det går fram av reguleringsplanen at influensområdet er avgrensa til elv og bekkesystem i nærleik til planområdet. Vidare er «avrenning frå steinbrotet i dag vurdert til å ikkje medføre negative konsekvensane for vasskvaliteten og livet i fjorden». DMF minner om forureiningsforskrifta kap. § 30 og plikta til å melde frå til forureiningsstypesmakta ved oppstart av verksemda. DMF understrekar at tiltakshavaren har plikt til å halde seg innanfor dei grenseverdiane som føljer av anna regelverk.

#### *Konsekvensar av tiltaket for kulturminner*

Kulturhistorie er handsama som eit eige tema i konsekvensutgreiinga, punkt. 7. Området er regulert til «bevaring av kulturminne og kulturmiljø frå tidlegare drift av steinbrotet», jf. reguleringsplanen punkt 4.3.

DMF støttar seg til dei vurderingane som blei gjorde i samband med reguleringsplanarbeidet, og meiner at omsynet til kulturminne er sikra. DMF minner likevel om den generelle varslingsplikta etter kulturminnelova § 8.

På bakgrunn av det som er omtala ovanfor har DMF kome til at det ikkje finst faktorar knytte til miljø og kulturminne som tilseier at det ikkje skal gjevast driftskonsesjon eller at det er nødvendig å setje vilkår om avbøtande tiltak.

#### **5.8. Tilhøvet til omgjevnadene og dei nærliggjande områda under drift**

Mineralressursane skal forvaltast og brukast på ein måte som tek omsyn til omgjevnadene og dei nærliggjande områda under drift. Det er difor viktig at drivaren gjennomfører nødvendige sikringstiltak for å unngå skadar på eigedom, menneske og dyr.

I driftsplanen er det opplyst om at området sikrast under drift. Før ein startar på ein pall skal skjeringstopp ryddast og maskinreinskast, og eventuelt sikrast med plastringsstein eller boltar. Undervegs i arbeidet skal brotveggen bli reinska og bolta om nødvendig. Ferdige pallhyller skal bli avstengd med fysisk hinder fram til permanent avslutting. Skjeringar mot aust vil bli sikra fortløpande med gjerde, mens driftsvegar og tippkantar skal midlertidig sikrast med vollar eller steinblokkar. I botn av deponi vil det bli etablert sikringsvoll mot steinsprang. Ved tilkomsten til brotet vil det vere infoskilt, og det er vegbom på tilkomstvegen som blir lukka når det ikkje er drift.

DMF har kome til at dette ikkje er avgjerande moment som talar mot å innvilge konsesjon.

#### **5.9. Kva tiltaket vil ha å seie for verdiskaping og næringsutvikling**

Førekomenst det er søkt om driftskonsesjon for fell inn under råstoffgrupperinga naturstein, blokkstein, skifer og murestein. Råstoffet blir brukt i produkt som det moderne samfunnet er heilt avhengig av, det vil seie Stein til bruk i uteareal, bygningar og monument.

Skiferen ligg i ei sone med blasto-mylonittisk gneis. Prøver som er utført syner god kvalitet. Murstein vil vere hovudproduktet.

#### **5.10. Langsiktig planlegging for etterbruk eller tilbakeføring av området**

I driftsplanen blir det opplyst om at ved avslutting vil skjeringstopp bli rydda for vegetasjon og reinska og sikra med boltar ved behov. Lausmassekantar vil bli arrondert



mot noverande terren og tilrettelagt for revegtering. Brotkant mot aust skal sikrast med gjerde. Sikringshyllar vil bli tilbakefylt med skrotstein dersom praktisk mogleg. Mellom tilkomstveg og mot brotet, vil det bli montert sikringsgjerde for å hindre tilkomst inn i brotet. Vegar og plassar som ikkje er til nytta skal stengjast fysisk av eller arronderast inn i terrenget. Arrondering skal bli gjennomført i den grad det er mogleg og bygningar og installasjonar skal fjernast etter ferdig drift. Maskiner, utstyr og avfall skal fjernast frå uttaket. Ved avslutting skal området blir tilbakeført til LNF og bli revegetert fortløpande med stadeigen naturleg vegetasjon.

Etter DMF si vurdering er dei planane som finst for etterbruk eller tilbakeføring tilfredsstillande, og såleis ikkje noko avgjerande moment som talar mot å gje konsesjon.

### **5.11. Økonomisk sikkerheit**

I søknaden om driftskonsesjon har Tiltakshavaren, i samsvar med forskrift til minerallova § 2-1, gjort framlegg til korleis sikkerheit kan stillast. DMF fastset dei endelige krava til sikkerheit.

Tiltakshavar har føreslått å stille NOK 898 280 i økonomisk sikkerheit, stilt som individuell avsetting og bankgaranti før oppstart. Berekninga er gjort med utgangspunkt i relevante poster i DMF sitt verktøy for berekning av økonomisk sikkerheit.

#### **5.11.1. Pålegg om å stille økonomisk sikkerheit og vurdering av kor stor sikkerheita skal vere**

Etter DMF si vurdering er Tiltakshavaren sitt framlegg til kor stor sikkerheita skal vere ikkje tilfredsstillande. Etter forskrift til minerallova § 2-1 tredje ledd skal den økonomiske sikkerheita vere tilstrekkeleg til å dekkje Tiltakshavaren si sikrings- og oppryddingsplikt.

Etter ei konkret vurdering av tiltaket finn DMF at Tiltakshavaren skal påleggjast å stille finansiell sikkerheit på NOK 2 040 000 for å sikre at nødvendige sikrings- og oppryddingstiltak blir gjennomførte etter minerallova §§ 49 og 50, jf. minerallova § 51. I vurderinga av kor stor sikkerheit som skal krevjast har DMF lagt vekt på sine eigne erfaringstal for tilsvarande uttak, med tillegg for eksterne og uventa kostnader.

#### **5.11.2. Form for sikkerheit**

Det skal stillast sikkerheit i ei slik form at den ikkje vil gå inn i konkursbuet i tilfelle konkurs hos Tiltakshavaren, jf. forskrift til minerallova § 2-1 tredje ledd.

Etter DMF si vurdering vil det vere føremålstenleg at den økonomiske sikkerheita blir stilt ved bankgaranti og individuell fondsavsetjing til ein bankkonto som det etter ein eigen avtale om finansiell sikkerheit skal etablerast pant i til fordel for DMF, jf. pantelova §§ 4-4 til 4-6. Tiltakshavaren skal ikkje ha råderett over denne bankkontoen, som skal vere sperra til fordel for DMF.

#### *Bankgaranti – oppstartsfasen*

DMF vurderer det som naudsynt at Tiltakshavaren, før drifta startar, stiller ein bankgaranti som DMF vurderer som tilfredsstillande som påkravsgaranti for eit beløp på NOK 510 000. Dette er naudsynt for å ha tilstrekkeleg sikkerheit i oppstartfasen før fondet har nådd maksimal avsetjing. Storleiken på bankgarantien er fastsett på



grunnlag av ei vurdering av kva som blir rekna for å vere tilstrekkeleg sikkerheit i denne fasen.

DMF kan fremje krav i høve til bankgarantien i desse tilfella:

- (i) Etter utløpet av Tiltakshavaren sin frist for å utføre naudsynte sikrings- og oppryddingstiltak som DMF godtek;
- (ii) Ved konkurs, opphør eller anna avvikling av Tiltakshavaren si verksemد; og
- (iii) Dersom konsesjonen blir trekt attende.

Ved melding til garantisten om at eitt av tilfella nemnde i punkt (i)–(iii) over har oppstått, skal DMF ha rett til å få utbetalt det kravet som blir gjort gjeldande etter bankgarantien, utan omsyn til motsegner frå Tiltakshavaren. Bankgarantien skal stå ved lag så lenge beløpet som står på bankkontoen ikkje har nådd NOK 510 000. Når beløpet på bankkontoen har nådd NOK 510 000, eller tidlegare etter skriftleg samtykkje frå DMF, fell plikta til bankgaranti bort.

#### *Individuell avsetjing, avsetjingsperiode og storleiken på avsetjinga*

Deretter skal Tiltakshavaren setje inn midlar på bankkontoen årleg fram til totalbeløpet på NOK 2 040 000 er nådd. Dei årlege innskota blir rekna ut etterskotsvis på grunnlag av masseuttaket året før. Det skal betalast inn NOK 1,08 årleg per tonn utteken masse.

Ved fastsettjinga av satsen per tonn utteken masse har DMF lagt til grunn at fondet skal byggjast opp over ein periode på 20 år, det vil seie NOK 102 000 per år. I søknaden er det rekna med eit uttak på 35 000 m<sup>3</sup>/år, tilsvarande om lag 94 500 tonn/år, noko som gjev ei årleg avsetjing på NOK 1,08 per tonn.

Innbetalinga for masseuttaket må vere avsett innan 1. februar året etter.

#### **5.11.3. Rapportering og dokumentasjon**

Beløpet som står på kontoen skal dokumenterast årleg ved å gje DMF tilgjenge til ei oppdatert kontoutskrift. All avkasting på midlane skal godskrivast kontoen.

I tillegg finn DMF det naudsynt at Tiltakshavaren underveis i drifta vurderer om den sikkerheita som er stilt er tilstrekkeleg til å dekkje kostnadene til sikrings- og oppryddingstiltak og gjev DMF tilbakemeldingar om dette. Dersom den fastsette driftsperioden for uttaket blir endra eller det skjer andre vesentlege endringar i driftsplanen, skal DMF informerast umiddelbart. Elles skal tiltakshavaren kvart femte år gjere ei ny vurdering av om sikkerheita er tilstrekkeleg. Når vurderinga er gjord, skal tiltakshavaren utarbeide ein rapport og sende den til DMF utan grunnlaust opphald.

DMF kan òg ha behov for meir rapportering og dokumentering enn det som er skildra over, og finn det difor naudsynt å påleggje Tiltakshavaren plikter i så måte i konsesjonsvilkåra.

#### **5.11.4. Justering av sikkerheita**

Etter forskrift til minerallova § 2-2 første ledd andre punktum kan DMF gjere vedtak om endring av storleiken på avsetjinga, inkludert dei årlege innbetalingane frå



Tiltakshavaren, og tidspunktet for innbetaling. Slike endringar kan òg gjerast når som helst ved endringar i minerallova og andre relevante lover, forskrifter og vedtak.

## **6. Kor lenge driftskonsesjonen gjeld**

Driftskonsesjonen kan reviderast etter 10 år.

Driftskonsesjonen fell bort dersom drift ikkje er starta opp seinast fem år etter at konsesjonen er gitt. Det same gjeld dersom drifta blir innstilt i meir enn eitt år. Det kan søkjast til DMF om å forlengje desse fristane. Driftskonsesjonen fell òg bort dersom:

- utvinningsretten for statens mineral blir sletta
- avtalen om rett til å utnytte førekommst av grunneigars mineral går ut
- skjønn ikkje er kravd innan eitt år etter at ekspropriasjonsløyve er gitt etter minerallova § 37 andre ledd bokstav a

Driftskonsesjonen kan ikkje overdragast. Det gjeld òg ved overdraging av Utvinningsretten.

## **7. Plikter for tiltakshavaren**

Tiltakshavaren har rettar og plikter som følgjer av minerallova med forskrifter.

### **Meldeplikt ved oppstart og stans av drift**

Seinast éi veke før oppstart av drifta skal tiltakshavaren sende melding til DMF.

Tiltakshavaren skal òg sende melding til DMF før drifta mellombels blir stansa eller lagd ned i medhald av minerallova § 44.

### **Drifta skal utførast med varsemd**

Drifta skal utførast med varsemd, slik at skadane ikkje blir større enn nødvendig. Etter minerallova § 48 skal arbeida heller ikkje føre til unødig forureining eller skade på miljøet.

### **Forsvarleg sikring og opprydding**

Området skal sikrast slik at arbeidet ikkje medfører fare for menneske, husdyr eller tamrein. Etter minerallova § 49 omfattar sikringsplikta òg gruveopningar, tippar og utlagde massar på område som er knytte til konsesjonsområdet.

Etter minerallova § 50 skal området vere forsvarleg rydda mens arbeida går for seg. Etter minerallova §§ 49 og 50 skal området vere forsvarleg rydda og varig sikra etter at arbeida er avslutta. DMF kan fastsetje ein frist for når oppryddinga skal vere avslutta.

### **Ansvaret til bergteknisk ansvarleg**

Bergteknisk ansvarleg har eit særskilt ansvar for å sjå til

- at drifta er teknisk forsvarleg og tek omsyn til arbeidstakarar, nærliggjande bygningar og omgivnadene elles
- at førekommsten blir avbygd på ein berekraftig måte
- at drifta til kvar tid er i samsvar med ein ajourført og godkjend driftsplan

### **Rapportering**

Tiltakshavaren skal sende årleg driftsrapport til DMF via «Min side» på dirmin.no.



## 8. Rett til å klage

Partane i saka og andre med rettsleg klageinteresse kan klage på vedtaket i samsvar med reglane i forvaltingslova kapittel VI.

Fristen for å klage er tre veker etter at de har fått dette brevet. Klagen skal sendast til DMF for ny vurdering. Dersom DMF ikke finn grunn til å gjere om vedtaket, sender vi klagen til Nærings- og fiskeridepartementet, som gjer endeleg vedtak i saka. I klagen må de gjere greie for kva de klagar på, og kvifor, og de må foreslå endringa.

Etter forvaltingslova § 18 og 19 har partane i saka rett til å sjå saksdokumenta.

For nærmare informasjon om minerallova med tilhøyrande forskrifter, sjå heimesida vår på [www.dirmin.no](http://www.dirmin.no). Her finn du og vår digitale kartløysning, som er eit nyttig verktøy for oppdatert informasjon om mineraluttak, bergrettar m.m., supplert med relevante kartdata frå andre etatar.

Med helsing

Marte Kristoffersen  
seksjonssjef

Ingrid Nygård Pedersen  
seniorrådgjevar

*Dokumentet er elektronisk signert og har difor ikkje handskrivne signaturar.*  
Sakshandsamar: Ingrid Nygård Pedersen

Vedlegg:

Vedlegg 1 - Kart over konsesjonsområdet - Sandvensura  
Vedlegg 2 - Avtale om finansiell sikkerhetsstillelse  
Vedlegg 3 - Avtale om påkravsgaranti  
Vedlegg 4 - Pantsettelseserklæring  
Vedlegg 5 - Godkjent driftsplan - Sandvensura

Mottakarar:

Hardangerskifer AS	Sandvenvegen 40	5600 NORHEIMSUND
--------------------	-----------------	------------------

Kopi til:

Hardanger Energi nett AS	Postboks 33	5782 KINSARVIK
Statsforvalteren i Vestland	Njøsavegen 2	6863 LEIKANGER
Norges vassdrags- og energidirektorat Region vest	Naustdalsvegen 1B	6800 FØRDE
Statens vegvesen	Postboks 1010 Nordre Ål	2605 LILLEHAMMER
Statnett SF	Postboks 4904 Nydalen	0423 OSLO
Vestland fylkeskommune	Postboks 7900	5020 BERGEN
Ullensvang kommune	Opheimsgata 31	5750 ODDA